

光緒贛榆縣志卷之十一

人物上

列傳 孝義 文學 藝術 隱逸 寓賢 壽民

舊志載孟卿以下汙於徐有功二十有二人大氏產郟蘭陵承東海海西非贛榆應有也飾州邦而敘人物李吉甫所云其不然歟舊志人物首稱唐咨咨始爲叛兵擁立旣敗逃吳旋復自吳降魏直恣睢反側之徒耳雖破獲羅厲討平廖式從丞相孫峻入淮泗功績赫然可觀要之無取董咨一人亦無事綴緝舊文踵五代史例特立雜傳李成梁劉肇基明史並稱遼東人勝朝殉節諸臣錄肇基贛榆人雖云孤證要與妄相牽附異焉今錄始末胡松年清忠亮節卓偉燦朗其餘或淵軌庠門或羽儀王路紬緦篇牒足動

光緒贛榆縣志

卷之十一

一

流連豈必借異地之才願其鄰之富哉

列傳

宋

胡松年字茂老海州懷仁人幼孤貧母粥機織資給使學讀書過目不念尤邃於易政和二年上舍釋褐補濰州教授八年賜對便殿徽宗偉其狀貌改校書郎兼資善堂贊讀爲殿試參詳官以沈晦第一徽宗大悅曰朕久聞晦名今乃得之遷中書舍人時方有事燕雲松年累章謂邊釁一開有不勝言者拂時相意提舉太平觀建炎間密奏中原利害召赴行在出知平江未入境貪吏解印斂跡以興利除害十七事揭于都市百姓便之加徽猷閣待制奏

防江利害一曰立國無藩籬之固二曰遣將無首尾之援三曰不
攻敵技之所短召爲中書舍人言武昌九江建昌京口吳江錢塘
明越宜各屯水戰士三千以爲備唐恪追復觀文殿學士松年繳
奏曰靖康之禍何梟輕脫寡謀宜爲罪首去年秦檜還朝力稱其
抗義守正遂被褫贈已大拂士論今恪子琢自陳其父不獲伸迎
請二帝之謀飲藥而死此事凜然追蹤古人宜詔有司詳考實狀
庶不爲虛美以示激勸除給事中會選將帥松年奏富貴者易爲
善貧賤者難爲功在上之人識擢何如爾願陛下親出勞軍卽行
伍蒐簡之必有可爲時用者又奏恢復中原必自山東始山東歸
附必自登萊密始不特三郡民俗忠義且有通泰飛艘往來之便

除兼侍講王倫使金還言金人欲再遣重臣來計議以松年試工
部尙書爲韓有胄副充大金奉表通問使時使命久不通人皆疑
懼松年毅然而往至汴京劉豫令以臣禮見肖胄未答松年曰聖
主萬壽豫曰聖意何在松年曰主上之意必復故疆而後已使還
拜吏部尙書岳飛收復襄漢令松年籌度守禦事松年奏乞飛班
師徐窺劉豫意向若豫置不問其情叵測當飭將士謹疆場可也
又條戰艦四利一曰張朝廷深入之軍勢二曰固山東欲歸之民
心三曰震疊疆敵使不敢窺江浙四曰牽制劉豫不暇營襄漢除
端明殿學士僉書樞密院事首奏八事立規模以定中興之基振
紀綱以尊朝廷之勢馭將帥使知畏撫士卒使知勸收予奪之柄

察毀譽之言無以小疵棄人才無以虛文廢實效又薦張敵萬向在淮南誘敵深入步騎四集悉陷於淖無得解者金人至今膽落乞令統率軍馬別爲任使庶幾外闔漸多名將不獨仗倚三四人而已諜報劉豫於登萊海密具舟楫淮陽順昌積芻粟欲憑藉金人侵我邊鄙議者謂韓劉岳各當一面可保無虞松年奏三人聲勢初不相屬緩急必不相救況海道闊遠蘇秀明越最爲要衝乞選精兵萬人命一大臣往駐建康親督世忠光世守采石馬家渡以張兩軍之勢仍以兵五千屯明州平江控禦江海或無人可遣臣願疾馳以赴其急詔遣松年往江上與諸將會議進討因覘賊情帝決意親征遂次平江命松年權參知政事專治戰艦張浚專

治軍器松年曰議論既定力行乃有效若今日行明日止徒紛紛無益俄以疾提舉洞霄宮卜居陽羨雖居閒不忘朝廷事屢言和糴科斂防秋利害帝皆嘉納十六年病革呼其子曰大化推移有所不免乃就枕鼻息如雷有頃卒人謂不死也年六十松年平生不喜蓄財每除官例賜金帛以軍興費廣一無所陳請或勸其白于朝曰弗請則已白之是沽名也喜賓客奉入不足以供費或請節用爲子孫計松年曰賢而多財則損其志況奉廩主上所以養老臣也自持囊至執政所舉自代皆一時聞人所薦一以至公權勢莫能奪方秦檜秉政天下識與不識率以疑忌置之死地故士大夫無不曲意阿附爲自安計松年獨鄙之至死不通一書世以

此高之

宋史
本傳

明

王英字俊之成化間由歲貢除滎澤知縣爲政務本仁恕有古良吏風

董傑字尚文正德中以歲貢除浙江孝豐令興利除弊悉從民便人深德之獲奉分給親族後歸老年逾八十卒祀鄉賢

邵思忠字廷臣正德中由舉人除商城令釐奸祛弊事覈而民不擾五年如一日後擢戶部主事督權潁墅雲中清節尤著三疏乞休家居十餘年卒祀鄉賢

賀爵字子序由舉人除湖廣湘鄉知縣遷開封同知再佐嘉興爲

光緒贛榆縣志

卷之十一

四

人狷介精明遇事立節其在湘鄉也革供應之繁卻葛氏千金餽分佐兩郡民皆頌之以告養歸

董志毅字子道十歲能文孝友敦篤佐瓊州爲上官所嫉罷歸事白復其官不就年八十四卒子杏曾孫璵自有傳

裴天祐字順之祖通字允達由歲貢除德清丞以風節自高天祐成進士凡同輩所爲乞差廣交紛華之事恥弗爲也令建安食御如寒士爲政務寬厚巡按山東初出朝時一權貴嗾之曰某州某判官墨且酷宜亟去旣而廉知其賢竟優獎之罪人挾萬金賂免死天祐籍其金於官寘之法晉大理人稱不寃擢光祿三月約省二千金旣歸杜門謝客著有拙逸亭稟校張峯海州志祀鄉賢

閻大祥字應和嘉靖間舉人判嘉興府有惠政爲人篤於好義初爲諸生時試南都同舍生王臣卒於邸大祥經紀其喪載之以歸晚年致仕閉戶課子有德望卒祀鄉賢

朱梓字柳津任俠好施子以三考補湖廣靖州天柱所吏目條議地方事宜巡撫江鐸器之卽其所改設縣治以梓爲天柱令營建城郭在任十五年加道州知州後以贊畫征楊應龍單騎降賊數十萬人敘加兵備道仍管天柱縣事以憂去官民立生祠者十有三奉敕建坊民自天柱運石以成之卒年七十有五 國朝雍正七年崇祀忠義祠

徐愼思字君睿幼敏異能立誦千言不譌一字以歲貢官浦江教

光緒贛榆縣志

卷之十一

五

諭士人德之爲立碑子可久字長白亦以歲貢除鎮江學官值丹陽民變攝縣事民懷其德遷福建永定知縣條奏息民足國數千言皆見嘉納平賊有功加戶部四川司主事銜迨知長汀縣引疾歸著有樹滋堂雜編固菴漫錄吾兼堂詩草卒年六十五

國朝

周泰元萃元俱有雋才泰元由舉人除甘肅鎮原縣嚴正不阿吏民懾服調永昌縣時征伊犁以軍功議敘一等忤上官被劾尋復保留甘肅辦平番縣城工賑務以疾卒萃元由進士教習除廣東徐聞縣以明幹卓薦遷山東曹州府通判引疾歸邑志其所修也

二人皆能吏未竟所施時論惜之

以上江南通志舊淮安府志嘉慶州志舊縣志

宋

單公選贛榆人祥興二年拜參政帝在匡山元張宏範襲破舟師丞相陸秀夫負帝溺海中公選從死

明

王振正德中為福建黃崎巡檢海寇大集振率民兵及子臣朝實拒戰斬獲甚眾俄伏起振死於陣尸僵不什朝實赴救亦被害詔優卹之蔭臣讀書國子監

王俊字華陽歲貢生性鯁直任河南新蔡教諭崇禎十五年李自成破新蔡俊坐明倫堂賊至令俊跪俊叱之手劔起殺數賊羣賊繼至擲俊目斷手至死不屈蔡人哀之為文以祭祀名宦

光緒贛榆縣志

卷之十一

六

黃宗顯貢生與諸生邵際時李仲張雲樹張蘊琦張必奎董宗春程雅化閻名題九人於崇禎壬午佐知縣高濂守城同時殉節

以上

江南通志 舊淮安府志 舊縣志

劉肇基字鼎維遼東人

勝朝殉節諸臣錄 贛榆人 遼東籍

嗣世職指揮僉事遷都

司僉書隸山海總兵官尤世威麾下崇禎七年從世威援宣府又從征中原賊進遊擊成維南蘭草川明年遇賊戰敗傷臂未幾世威罷肇基及遊擊羅岱分將其兵與祖寬大破賊汝州斬首千六百有奇後從寬數有功而其部下皆邊軍久戍思歸與寬軍謀而走總理盧象昇乃遣之入秦其秋畿輔有警始還山海竟坐前罪解職令從征自效俄以固守永平功復職屢遷遼東副總兵十二

年冬薊遼總督洪承疇請用爲署總兵官分練寧遠諸營卒兵部尚書傅宗龍稍持之帝怒下宗龍獄擢肇基都督僉事任之明年三月錦州有警承疇命吳三桂偕肇基赴松山爲聲援三桂困松杏間肇基救出之喪士卒千人七月與曹變蛟等戰黃土臺及松山杏山九月復戰杏山肇基軍稍卻承疇甄別諸將解肇基職代以王廷臣十七年春加都督同知提督南京大教場及福王立史可法督師淮揚肇基請從征自效屢加左都督太子太保可法議分布諸將奏薦李成棟賀大成王之綱李本身胡茂楨爲總兵官成棟鎮徐州大成揚州之綱開封本身茂楨隸高傑麾下爲前鋒而令肇基駐高家集李棲鳳駐睢寧以防河棲鳳本甘肅總兵以

光緒贛榆縣志

卷之十一

七

地失留淮揚間也閣標前鋒則用張天祿駐瓜洲十一月肇基棲鳳以可法命謀取宿遷初八日渡河復其城越數日大清兵圍邳州軍城北肇基等軍城南相持半月大清兵引去順治二年三月大清兵抵揚州可法邀諸將赴援獨肇基自白洋河趨赴過高郵不見妻子旣入城請乘大清兵未集背城一戰可法持重肇基乃分守北門發砲傷圍者已而城破率所部四百人巷戰格殺數百人後騎來益眾力不支一軍皆沒副將乙邦才馬應魁莊子固等皆同死乾隆四十一年 賜諡忠烈

明史
舊志

韋大重崇禎十七年寇擾海隅被執不屈死

舊志本章
氏家乘

國朝

孟悌字公正與弟慊皆孝友有勇略明季羽山寇李二和尚聚眾
剽略悌慊練鄉兵禦賊互相救援賊屢卻乃結山東盜曹武生併
力攻悌慊援者聞而走順治元年八月賊突至悌與慊力盡被執
悌語賊曰首事者我願代弟命慊曰兄無子弟有子願死賊感其
義乃釋悌悌行數武而慊被害遂罵賊竝及於難

孟貞墀字龍伯諸生虬髯長軀天性孝友善屬文從善如轉圜尤
精騎射與叔璟兄貞型同禦賊鄉人倚以為重年四十四卒遠近
哀之

孝義

元

光緒贛榆縣志

卷之十一

八

王士安弟士寧家赤貧奉母甘旨無缺至順間以孝旌

明

劉煥弟炯赤澗社人性孝友父卒煥廬墓三年母卒炯亦如之知

縣侯保式其閭名所居曰孝義莊

鄒翰孝義莊記贊皇侯君之令
贛榆也間邑人劉氏二子孝行

命駕即其家見松檜掩映水石清妙悠然有隱居之趣忠厚之風
因名其居曰孝義莊蓋煥兄弟四人曰炤曰輝者俱敦義讓而煥
與弟炯事親尤能行人所難行故侯君表其莊以示勸昔柳子厚
官柳州凡一山一石及士大夫居處之地皆登覽遊翫立石為文
以記之至今傳為美談今煥炯孝義過人而是莊風俗淳美非山
水名勝可比宜乎侯君旌之以孝義使名傳於無窮而一時薰德
善良以盡夫天倫之樂者必自此始矣予以官滿將赴
京師邑人趙淑良道其事因書此以彰侯君成人之美

管名父母沒廬墓六年負土成墳手植松柏宏治八年舉鄉飲年

踰七十知縣黃圻式其廬臺司屢獎之

劉守良字君遂由進士歷官行人司行人工部郎中性峭直有名於時少爲諸生母病思食菌不可得悲號竟夕據木假寐旣覺若有物視之菌也爲羹進母遂愈今鄉人能指其菌生處沒祀鄉賢王臣字蹇夫正德九年與弟朝實隨父振黃崎巡檢任時海寇大集振與賊戰死朝實亦死臣身被數創蔭國子監生嘗肄業他室鄰女夜奔之時大風雨女以屋毀求入臣堅拒之又求火臣自門隙授之女慚而退

賀昇喜施予夜有蹇驢負重篋至其家昇知爲過客所遺治具候門客追至引入還之客奉百金爲壽不受昇無子逾年舉子孫爵舉鄉薦

光緒贛榆縣志

卷之十一

九

蔡存仁字希堯以歲貢授膠州訓導先是歲例存仁當貢憫同學陳孟愨年老讓之人以爲厚屢與鄉飲正賓

唐豸字肅卿任福建尤溪訓導事親至孝邑宰重之嘗助其喪同舍生徐邦驥孫佐計食餼期後於豸當貢豸讓而先之學使者獎焉

楊澄字惟潔嘗館于縣宰邑人劉化民陷獄瀕死澄不識化民而曲爲伸理卒不使知由歲貢任縉雲訓導卒於官臨終沐浴冠帶自爲遺命

邵柝字子繫官平陰訓導孝友誠信與人無忤撫兩幼弟長而異財讓厚取薄鄉里稱義

閩世儒增生性孝友盡色養以事二親讓分產以恤諸季六親貧者待以舉火坐客常滿好臧否人物人愛畏之

徐經字伯常官崇德教諭天性嗜學事母以孝稱恥爲利殖及晚

年自養不贍人咸惜焉

三人本舊志
嘉慶州志無

董志宏字子任官武定州學正幼孤撫于其兄志宏敬之如父嘗拾遺金于泗州候數日還其人人有過絕口不言其厚如此

劉梓煥四世孫父母病籲天求代親沒負土成邱獨處墓所六年裹足不入村落當道表其門年九十二卒

李仁母周老而瞽仁燃指以禱目復明父遷病篤忽思肉食仁刲股以進遂愈父母死廬墓三年終身不茹葷卒年七十餘

光緒贛榆縣志

卷之十一

十

王華字朝光以賑例任醴陵主簿孝謹純慤一鄉稱善人居官不以位卑貶所學醴陵人立石以紀其政

王桂字蟾所七歲而孤性嗜學試輒冠曹以副貢選鳳陽校官勤考課諸生貧者蠲奉助之子居辰字紫虛崇禎十三年大饑道殣相望居辰悉掩埋之又嘗蠲資助修學宮凡負債而貧者輒焚其券舉鄉飲正賓卒年八十一

劉效字龍泉有文武才通春秋大義熟諸史勇畧過人能平地躍起三丈運槊馳射嘉靖時土寇唐良爲民患效馳騎捕之良善走日三百里效所乘馬日五百里其僕郭山亦善走與馬并馳追良及之縛以還又響馬盜王博殺哨長效單騎追至夾谷山博先遁

去獲其妻子自是號爲飛將軍萬曆十三年鳳陽指揮畢重威叛據清河漕撫陳爝檄召效效偕其甥蘇君守君守力舉千斤與郭山爲左右翼直抵賊所重威揮雙刀出效從馬上躍過重威背投以矛重威踣生禽之爝大喜欲官之效以親老固辭遂歸年八十卒

李之蕃諸生萬曆四十三年山東大饑蕃買妾詢其所自云生員趙某妻也蕃愕然遽令居別室遺書其夫還之之茂亦施舟造梁完人婚姻勇於好義云

柏志達附生萬曆四十三年山東大饑流民自鬻夫婦多不保達輒爲衣食居處之弟志遂亦良農力行爲善屢舉鄉飲

嘉慶州志無

光緒贛榆縣志

卷之十一

十一

趙自新天啟二年大饑自新代人完逋賦釋里甲累天啟六年崇禎三年又饑自新蠲貲如前啟聖宮災同諸生柏志達助建有董典史者死於官貧甚自新爲經紀其喪年八十卒

劉作標撫兄遺孤補諸生造儀鳳蕩橋知縣式其閭卒年九十餘歲

董石附生耕田讀書終身與物無忤屢舉鄉飲以壽終

嘉慶州志無

徐宏勛字漢石敦友愛好施予居近市廛有賈客遺金宏勛封置梁間後其子至卒還之邑人有欲嫁妻完賦者宏勛代之輸納全其夫婦卒年七十九

朱應吉天柱令梓子嘗割股爲羹以療母疾臺司表其門弟應祐

字篤予諸生崇禎十年山東饑賈客王某投祐買米後王死於兵應祐以米易銀訪其子還之嘗置婢見其父持之泣憐其情毀券還女六與鄉飲卒年八十三

朱從周字斐文明末父爲賊害從周涕泣誓報晝夜訶刺竟獲賊以歲貢除宿松訓導調太湖望江訓導升滁州學正署滁州知縣疆吏蓋將大用之從周遽引疾歸卒於家

張爲善崇禎十五年大兵克城被執將殺其父爲善請以身代遂兩釋之

國朝

閻餘康字晉水有識量高曾以來四世同居嘗以厚產讓其叔明光緒贛榆縣志
卷之十一
十二

末由歲貢爲嘉祥訓導值寇亂權泗水縣事弭盜有功再權嘉祥

躬冒矢石活民甚多順治四年以病歸卒年七十三

張煜以歲貢官齊東知縣父其蘊卒煜膝行引柩哭無時遂廬墓後芝生于墳順治十年知縣穆爾謨請建坊雍正九年入祠

張必揚順治七年榆園賊畧青口劫其二弟去母大慟必揚出謂賊曰弟幼不能充役願以身代賊義而皆釋之大疫施棺冬施絮衣康熙四十三年饑必揚首率錢施粥活數千人歲常買麥賙其親族之貧時有以挑塹訟者必揚代爲平之所行類如此舉鄉飲賓卒年八十六

張永延驍勇過人馬上用二鐵鎗重六十餘斤步戰用戈重百餘

斤 國初時爲百夫長流賊聞永延名皆遠遁康熙八年總漕蔡士英北上被巨盜劫行李召永延捕之永延年已六十餘馳馬禽賊盡獲所畧士英表其閭曰勇鎮一方欲官之永延以老辭二十五年卒今所用鐃猶存其一同時有徐安亦勇健善門用槍重十斤順治五年羽山賊焚略村鎮安率眾禦賊賊不敢犯曾臥疾賊至安曰北方恃孟璟南方恃吾吾不可已遂起以麻縷縵小石

磨提之出賊望見驚走

徐安嘉慶州志無

董宗鼎字九吾監生性孝友父沒與伯季分產自取瘠薄善治生家益饒性好施予邑令徐翀蠡縣進士張懋德客死於贛宗鼎經紀其喪康熙十一年知縣俞廷瑞請除額荒五百餘頃鼎蠲貲佐

光緒贛榆縣志

卷之十一

十三

完賦母年九十四病革時鼎已七十三矣猶日夜侍旣沒如孺子慕云

張其美字尊甫與父問明俱附生問明少孤有隱德其美居治前爲縣城衝要常閉戶自精不窺戶闡教子孫以讀書明理建修宗祠獨任其事康熙十二年復修縣志美日策蹇歷鄉曲采訪攬摭故事屢舉鄉飲

張潛字亦昭附生少孤事母至孝榆園賊焚畧青口獲其叔鎬脅求金錢鎬無以應潛白母取出藏金救之子孝歲貢生能承潛志與弟皚友愛甚篤分其貲與兄弟之貧者訓讀嚴正有法造就甚眾孫廷著孝事繼母遣嫁女兄弟皆厚其貲與親族貧者田稷盡

蠲其所獲人稱世德云

二人嘉慶州志無

仲悟字融仁監生先賢仲子六十四世孫質直好義率族人立宗祠鄰里有相爭者輒思解之不得至廢寢食其所居凡三十餘年無終訟者鄰人貧不能婚出已貲助之有田僅三百畝而恤貧濟急恐不及沒之日家無儲粟人以是益賢之卒年七十有四

呂方頌字賡臣廩生性至孝侍親疾衣不解帶親沒負土築墳三年未嘗輟涕泣侍諸父惟謹教子姝以禮遇貧乏輒周濟之雖家無儋石不計也三舉優行人以爲允

尙全吉雍正八年大水出積粟以給貧者社倉初立全吉首勸鎮人納穀身任其事春秋出納人服其公貸穀之家有貧不能還倉

光緒贛榆縣志

卷之十一

十四

者代償之臨終命子出債負未收者焚其券卒年八十餘

吳廣俊字秀賓父母年耄喜間靜廣俊植花木以供怡賞人稱其養志從父瑁早亡廣俊爲立嗣以叔母苦節請建坊收養從弟廣惠廣濟爲之授室雍正九年饑廣俊出米施粥每冬置故衣濟寒者行之數十年不倦邑中人濟橋大石橋城隍廟張仙廟皆所建也子孫多讀書爲良諸生

李霖字霖光增生性嚴正教子弟有法事繼母以孝聞弟霆早卒其聘妻趙奔喪守貞霖爲請旌敬禮深至

尹伸附生疎財好義康熙四年縣丞方燦聞其賢延之教子燦喪妻匱不能舉伸蠲已財助之山東劉△流落縣中亦賴伸助得歸

卒年六十九

董思樂字行可職員家素貧兄思義不治生產思樂時年十五身任耕作以佐兄讀後家稍豐倡立家祠置祭田有忿而訴者爲之剖解無不悅服

董曾引監生父霆以會昌知縣擢府同知疾卒於京哀毀盡禮叔霑歿於樂亭引爲籌畫歸其喪與弟分產自取其薄者於親戚鄰里緩急相濟無德色焉

四人嘉慶州志無

王九寧幼孤兄弟析居九寧受地十六畝見諸兄貧仍以地歸之時充里長役最苦以身代諸兄邑宰知其賢勸之卒學補弟子員其族人名宗者貧不能娶出貲助之且授以田卒年八十四

光緒贛榆縣志

卷之十一

十五

周維寧字靜遠讀書識大義敦內行撫孤甥韋鉅如己子比長爲之婚勉之學後爲名諸生族子恩溥早死其妻殉節維寧爲之請旌建坊質產助成之家非素封鄉人有待以舉火者

王士槐字左三廩生性至孝侍父起居不入私室父畏暑每盛夏臥輒輕拂以簟父知而卻之旣寐如故父沒士槐營葬親負土廬墓三年朝夕哭拜羣鳥翔鳴如助其悲晚年益好善竟無子

劉行燦父菊諸生家極貧行燦與兩兄皆傭以養母病篤思食鴿行燦求之不能得忽恍惚聞人語鴿肉近在爾身何他求行燦仰天泣曰神命之矣遂割左股烹以進曰鴿肉也母食之而差行燦喜甚將再割而血溢不止語其兄曰我死母生無所恨慎勿令母

知也逾夕竟卒

以上嘉慶州志

程作柱字滙書候選經歷孝友睦族凡鄉里河梁道路及施藥埋
貳行之四十餘年道光二年大饑倡蠲銀五百兩十二年又饑倡
蠲銀二千兩立義塾諸生成名者十餘人

余殿緯字星五魁梧有勇略以都司候選天資厚重言笑不苟接
人以和敬寡嫂如母輕財樂善道光十二年歲大饑倡蠲穀千石
益汎舟航海轉運糧粟全活甚眾

劉啟俊字春臺監生數歲喪母躡踊如成人家素貧至俊六世同
居家人益繁啟俊撫兄弟從兄弟之子如己子臨終訓曰同居無
他難惟不聽婦人言耳傳至從子仁凡七世

光緒贛榆縣志

卷之十一

十六

周定溥字鴻賓內行純篤然諾無欺由監生官刑部司獄矜恤罪
囚嚴明盡職終其任獄囚鮮瘐死者咸豐十年假歸值撚匪侵竄
舉火自焚死

蔣時字屢中附貢生以勤儉起家與弟明曙相友愛未嘗析居道
光間歲頻大饑出積粟千餘石以賑貸修建學宮書院皆身任之
張正吉字麗貞監生質直好義鄉里得一言以爲重同治七年撚
匪犯青口適淮軍提督劉銘傳躡賊至糧盡不能戰乃與汪元愷
等籌通饟道於城南年七十六卒

趙汝翰字維周監生年二十餘出爲叔後叔生子卽歸宗讓產於
弟汝福家貲十萬一無所取鄉里賢之

程裕芳字馨若監生父爲某甲所誣鬱死裕芳奔走上控三年而
寃白奧匪之亂印明楊忠愍公傳廣貽戚里意盖以義憤感激之
也

王岐源附貢生事親以孝聞家凡父母所愛之人必愛之曲盡周
卹終身無間鄉鄰以細故相競必苦口排解所居興莊三十年無
牒訟者撚匪之亂源連絡聲勢築圩團練民甚賴之

王伯懷家貧無妻子寡母雙瞽懷傭所得直日必具甘旨或道遠
不卽歸必倩人代供三十餘年無少懈母歿終身孺慕不衰

管永和天性孝友年十九父母歿哀毀幾以身殉旣合葬於吳山
之前去家十餘里隻身廬墓負土築墳每日先奠而後食三年始

光緒贛榆縣志

卷之十一

十七

返

張毓禮父卒善事寡母以妻不得於姑立出之晨昏定省惟恐拂
母意人稱其孝

鮑懷寶年十九父歿事母孝同治十一年十一月二十三日鄰夜
火起延燒母室寶歸呼母不見冒火出入數四火滅母子共死一
處其鄰殷巧德年十四當火起時呼母不見入護母出復以母命
救姊冒火入傷重旋死

鄭翰林字益卿歲貢其父恩墀當庚申之亂棄家弗顧囊負先主
而逃賊追及感其孝釋之林精醫母病嘗藥不解衣者數月勞瘁
成疾母卒以哀死

閻繼賢允執子平日色養周至允執疾篤賢日夜侍湯藥嘗糞先卒里人哀之

諶肇梁字甸之監生生有至性祖母王嘗病痢噤不飲食梁侍左右寐不就簞扇不停手者數月

諶秉寬事母至孝嘗病膈慮不能奉母餘年時背母流涕一日嘔出血塊病愈說者謂孝思所致也

劉彥田農家子也父五十病臥不起田夫婦晨昏奉養三十餘年如一日鄉里稱之

程世昌監生家故不豐父簡好施與凡鄉里善舉昌輒先意爲之父歿母孫亦好施昌順之如父母老多病昌席牀下躬親湯藥者

光緒贛榆縣志

卷之十一

十八

六載

劉以濬字利川廩生客授奉母曲盡孝道一弟不才旣析居仍收養之

李懷三字錫蕃候補刑部司獄家素封倡建宗祠卹族人之貧病者復施董馬莊養田鄉人刻石頌之

朱兆棟兆桓族兄弟也棟富而桓貧棟好施與值饑歲蠲糧數百石他善舉亦勇爲之桓嘗路拾錢帖四百千反之失主

韋庸附生康熙中 詔免錢糧庸如常納賦知縣告之故遣之庸曰 朝廷爲民貧故也不貧何敢濫冒況今民無聊賴使富室盡

如額納振卹有資矣由是富者盡納丁銀縣爲請振民以全濟

王鉅監生道光五年大蝗鉅與日照諸生董作林率鄉人晝夜撲滅知縣 旌其門

陳應升士升兄弟同居隔青口一河道光十三年歲饑應升出積粟散振全活甚眾二十二年又饑士升踵行邨無餓者

蘇儉文字鵬格增生幼孤事母以孝聞性好施與排難釋紛沒後會者數百人至有輟耕罷市者

蘇奎文字星垣監生繼伯父後孝友仗義與兄儉文齊名三黨霑惠奧賊犯境時諸不逞蠢蠢欲動奎團練風諭咸畏服焉

張如松字夢喬輕財尚義鄉里治道成梁諸役皆身任之咸豐十一年五月賊據青口縣西南練勇數百由馬廠東擊賊遇雨暫駐

光緒贛榆縣志

卷之十一

十九

松出米麥蔬菜給諸鄰造飯以餉勇得飽食因破走之年八十五卒

朱希掌三十婦亡不娶教子以勤儉起家道光中年八十四卒所修寺觀橋梁至多

朱堯笏字進思附生素好名義嘉慶年間役夫濬河民間頗受擾害笏爲呈請兵備道申禁立碑

程步僑字東村從九銜父廷芝有隱德僑生而孝友弟明志早卒遣二女無子僑爲立嗣推已產與之弟婦以節 旌嘗遊沛直河

決途遺幼子女二人僑攜歸撫成之咸豐十年九月撚匪薄城悉發藏粟佐軍食凡七晝夜而圍解賊遺所略山東穉弱收養送歸

焉
以上節王
文炳稟

徐永柱字蓮洲忼慨好施業饑淮北客旅多資其力以歸咸豐庚申寇略青口永柱具舟以濟孤嫠之貧者舟隘不能容危急間俄一舟駛至求載永柱怪之其人自言昔爲怨家誣陷禍幾不測賴公營脫公不識耶

光緒贛榆縣志卷之十一終

光緒贛榆縣志

卷之十一

二十